

23 APR 2001

MAHATHIR-RMK8

RMK-8 UNTUK CAPAI PERTUMBUHAN MAMPAN YANG BERDAYA MAJU, KATA PM

KUALA LUMPUR, 23 April (Bernama) -- Perdana Menteri Datuk Seri Dr Mahathir Mohamad berkata Rancangan Malaysia Kelapan (RMK-8) yang bertemakan mencapai pertumbuhan mampan yang berdaya maju membabitkan jumlah peruntukan sebanyak RM110 bilion.

Tiga teras utama RMK-8 adalah mengubah strategi pertumbuhan daripada strategi berasaskan input kepada strategi yang didorong oleh pengetahuan bagi meningkatkan potensi pertumbuhan keluaran, mempercepatkan perubahan struktur sektor pertanian, pembuatan dan perkhidmatan serta memperkukuhkan kestabilan sosio-ekonomi menerusi pengagihan pendapatan dan kekayaan negara secara saksama.

Ketika membentangkan usul mengenai RMK-8 di Dewan Rakyat di sini hari ini, Dr Mahathir berkata pembangunan negara ke arah ekonomi berasaskan pengetahuan akan meliputi semua sektor dan melibatkan segenap lapisan rakyat.

Kesemua pihak perlu dan sewajarnya boleh menggunakan pengetahuan yang berasaskan maklumat secara meluas dan mendalam, katanya.

Perdana Menteri berkata kandungan pengetahuan bagi semua aktiviti ekonomi sama ada dalam sektor pertanian, pembuatan atau kerajaan perlu dipertingkatkan bagi memperkukuh nilai ditambah dan mewujudkan peluang pekerjaan.

Di bawah peruntukan yang disediakan itu, sektor ekonomi akan diberi peruntukan yang terbesar sebanyak RM50.5 bilion atau 45.9 peratus daripada jumlah peruntukan.

Daripada jumlah itu, RM7.9 bilion atau 7.1 peratus adalah untuk sektor kecil pertanian, RM10.3 bilion (9.4 peratus) untuk perdagangan dan perindustrian manakala pengangkutan dan komunikasi diperuntukkan RM22 bilion (20 peratus).

Dr Mahathir berkata sektor sosial akan diperuntukkan RM37.5 bilion (34.1 peratus) yang mana lebih daripada separuh adalah untuk pendidikan dan latihan.

Sektor keselamatan pula diperuntukkan sebanyak RM10.8 bilion (9.8 peratus) manakala sektor pentadbiran am RM11.2 bilion (10.2 peratus) daripada jumlah peruntukan.

Perdana Menteri berkata kerajaan juga memperuntukkan sebanyak RM13.2 bilion untuk program pembangunan luar bandar dengan sebahagian besar daripadanya akan disalurkan untuk pembangunan tanah, pembangunan sumber manusia dan pelaksanaan pelbagai infrastruktur fizikal dan sosial termasuk jalan luar bandar serta bekalan elektrik dan air.

Katanya, tumpuan program itu untuk mengubah kawasan luar bandar supaya menjadi lebih kondusif kepada pelaburan serta membina kehidupan desa yang lebih menarik di mana rakyat dapat menikmati pelbagai kemudahan asas dan infrastruktur berkualiti di samping perkhidmatan sosial yang lebih baik.

Dr Mahathir berkata teras pembangunan infrastruktur dalam tempoh RMK-8 adalah untuk menaik taraf dan menambah kemudahan infrastruktur terutamanya di kawasan kurang maju serta meningkatkan produktiviti dan kecekapan di kawasan bandar.

Daripada peruntukan untuk pembangunan infrastruktur, 78.6 peratus adalah untuk sektor pengangkutan.

Sebanyak RM4.9 bilion daripada peruntukan sektor itu adalah untuk pembangunan jalan baru bagi membuka koridor pertumbuhan serta meningkatkan perhubungan ke kawasan luar bandar.

Tambahan sebanyak RM9.1 bilion akan dibelanjakan untuk memperbaiki dan menaik taraf jalan sedia ada bagi meningkatkan keselamatan dan keselesaan memandu serta memendekkan masa perjalanan.

Dr Mahathir berkata untuk mengurangkan kesesakan lalulintas di pusat bandar utama, pengangkutan awam yang bersepadu, cekap dan berdaya harap serta sistem pengangkutan pintar akan dilaksanakan.

Menurutnya, keupayaan dan kecekapan perkhidmatan rel akan dipertingkatkan dengan pelaksanaan projek landasan elektrik berkembar dari Rawang ke Ipoh, dan seterusnya ke Padang Besar di utara dan dari Seremban ke Johor Bahru di selatan.

Untuk memenuhi permintaan yang semakin bertambah, keupayaan dan kecekapan pelabuhan dan lapangan terbang juga akan dipertingkatkan, kata beliau.

Perdana Menteri juga berkata sebanyak RM4 bilion akan diperuntukkan bagi melaksanakan projek penyaluran air antara negeri, membina dan menaik taraf loji rawatan air serta mengurangkan kehilangan dan pembaziran air.

Katanya, usaha untuk membangun dan membaikpulih loji rawatan pembetulan bertujuan memperbaiki dan memperluaskan perkhidmatan pembetulan akan dilaksanakan dan peruntukan sebanyak RM1.6 bilion disediakan.

Dr Mahathir berkata peruntukan pembangunan bagi pendidikan dan latihan pula akan digunakan bagi menambah peluang dan memperbaiki kualiti pendidikan dan latihan terutama untuk memenuhi keperluan ekonomi berasaskan pengetahuan.

"Kapasiti program pendidikan dan latihan dalam bidang sains dan bidang berkaitan teknologi akan diperluaskan. Kemudahan tambahan akan disediakan manakala kemudahan sedia ada dipertingkatkan."

Di peringkat pendidikan tinggi (tertiary), beberapa universiti, politeknik dan institusi latihan kemahiran baru akan dibina, kata beliau.

Bagi perkhidmatan kesihatan, Dr Mahathir berkata tumpuan akan diberi bagi memperluaskan skop dan liputan serta mempergiatkan pelaksanaan perkhidmatan penggalakan, pencegahan, penyembuhan dan pemulihan.

Perumahan dan perkhidmatan sosial lain akan terus diberi keutamaan bagi meningkatkan kualiti hidup rakyat dan menyumbang kepada pembentukan masyarakat penyayang, katanya.

Menurutnya, keutamaan juga akan terus diberi untuk pembangunan rumah kos rendah dan sederhana rendah manakala pembangunan rumah kos rendah akan dipercepat untuk memastikan rakyat yang berkelayakan akan disediakan rumah sama ada untuk disewa atau dijual kepada mereka. -- BERNAMA

MKO OS